



**Uunga siunnersuut: Ilinniartitaanermut inuussutissarsiutinullu siunnersuisarneq pillugu Inatsisartut
Inatsisaata allanngortinneqarnera pillugu Inatsisartut inatsisaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)
(Siullermeerneqarnera)

Qujanaq Naalakkersuisut siunnersuummut, Demokraatiniit tapersersortarialittut isigisatsinnut.

Siunnersuut meerartatsinnik inuusuttatsinnillu aqutissiuussinermik suliamut annertusaanermut alloriarnertut pingaartutut isigaarput, ilinnialernissaminut suliffeqalernissaminnullu annertunerusumik ersarissumik paasiuminartumillu aallariarnissaminut tapersersorneqarniassammata.

Siunnersuuteqarnermi ersarinnerulerpoq, kia aqutissiuussineq akisussaaffigineraa. Inuusuttunut 18-nit inorlugit ukiulinnut meeqqat atuarfiata akisussaaffigaa inuusuttut aqutissiuullugillu malinnaaffiginissaat, Majoriallu siunissami inuusuttut, 18-nik ukioqalereersimasut ukkatarissavai. Ersarissumik immikkoortiterneqarput taamaaliornikkullu pitsaannerusumik malinnaaffigineqarsinnaalerlutik eqqortumillu aqutissiuunneqarnissamik pitsaannerusumik aallaaveqalerlutik. Akisussaaffik paatsuugassaanngitsumik inissippat, neriunarpoq aamma kingunerissagaa, inuusuttut takanneqarnissaat.

Pingaartumik maluginiarparput, siunnersuut qulakkeerinneqataasinnaammat, inuusuttut 18-nit inorlugit ukiullit aqutissiuunneqartalernissaat, kisimiillutik imaannaanngitsumik toqqaannginnerminni. Aqutissiuussineq paasiuminarnerulersinneqarpat, inuusuttut amerlanerit ikiorneqarnissaq pisariaqartitartik pisinnaalissavaat, nalornisiginagu, sumut saaffiginnissallutik. Periarfissaannut annertusaataassaaq ingerlariaqqinnissamut ilinniagaqarnermut imaluunniit suliffeqarnermut. Inuusuttunut 18-nit qaangerlugit ukiulinnut Majoriaq pingaarutilittut inissisimanini ingerlatiinnassavaa aqutissiuussinissamik tapersersuinissamillu, tullianut alloriarnissaminut nalornisunut.

Demokraatit nakuussutsitut isigaa, meeqqat atuarfiata, nukarlernik aqutissiuussinissamut akisussaaffimmik tigusinera. Atuarfiit inuusuttut taakkulu angajoqqaavi ilisarissimavaat, inuusuttullu inissisimanerat ilisimaarilluarlugu. Taamaattumik tamanna pissutigalugu pisariinnerussaaq ingerlateqqiinissaaq ataqatigiisitsinissarlu. Aqutissiuussineq paasiuminarninngorpat, piffimmilu ataatsimi katersorneqarpat, aamma taamaaliorneq inuiaqatigiinnut pisariinninngussaaq pingasuartumik iliuuseqarnissamut, inuusuttoq tapersersorneqarnissamik pisariaqartitsippat.

Oqaatiginngitsoorusunngilagulli tusarniaanermi akissutit isornartorsiuisut tiguneqarsimasut. Ilaatigut IMAK-p meeqqat atuarfiani maannakkut atugarineqartut aallaavigalugit akisussaaffimmik tamakkiisumik tigusisinaanersoq isumakuluutigaa, aammalu tamanna pisinnaanersoq atuartsinerup pitsaasusaa kalluanngikkaluarlugu. SIK-p aamma uparuarsimavaa, nukiit piginnaasallu ukkatarineqarnissaat, suliaq pitsaasumik inernejassappat. Taakku pingaarutillit ilungersunartutut tiguagut,



kajumissaarutigerusupparpullu, ataatsimiititaliani suliarineqalerpata sukumiisumik misissorneqarnissaat, siunnersuummi anguniakkat piviusunngortinneqarsinnaaniassammata.

Demokraatinut anguniagaq ersarippoq: Inuusuttut tamarmik sussanerlutik paasissallugu periarfissinneqassapput. Arlaannaalluunniit tapersorsorneqarani ingerlassanngilaq, aammalu arlaannaalluunniit kisimiittutut misigissanani. Inuttut ataasiakkaatut inuiaqatigiinnullu pitsaasumik kinguneqartussaavoq, qulakkeerutsigu, inuusuttut amerlanerit ilinniagaqarnissamik periarfissinnissaat ataatsimoornermullu pilliuteqaqataallutik.

Taamatut oqaaseqarlunga nalunaarutigissavara, Demokraatit siunnersuut una akuereqqullugu innersuummassuk aammalu Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliami aappassaaniinnginnerani suliareqqinneqarnissaa innersuussutigalugu.